

四庫全書

集部

欽定四庫全書

集部

西山文集卷四十九

詳校官庶吉士_臣張溥

總校官降調編修_臣倉聖脉

校對官主事_臣陳墉

謄錄監生_臣薛翰

欽定四庫全書

西山文集卷四十九

宋 真德秀 撰

青詞

上元設醮青詞

斗里分符洊任宅生之寄三元肇序適當錫福之辰端
一意以致祈為羣黎而請命睠清源之吉壤本南土之
富州爰自邇年頓非舊觀七邑而二為煨燼十室而九

之蓋藏番舶罕來市廛之失業者衆舡粟弗繼軍民之
仰糴者艱矧更旱暵之餘彌覺歎愁之甚臣起從詞館
復玷州麾雖懷及物之深誠未得裕民之要術屬臨令
節虔籲高穹耒耜方興願霈及時之澤蘆蕘將實冀全
率育之功融風息而閭井莫居駭浪平而舳艫交集俾
斯人浸有於生意則微臣均荷於至仁銷沴致和端有
斷於造化奉公履正當無愧於神明

丁亥生日設醮青詞

微生多幸敢忘天地之恩大造難醕惟極晨昏之感肆
陳愚悃冒瀆明威汎觀六合之間以及萬殊之衆人貴
乎物而臣獲爲人士首乎民而臣叨爲士力學者豈能
必第臣則薦玷於科名從官者鮮或遇知臣則誤塵於
禁近若臨政之悔尤謹寡與立朝之本末粗明罪當重
以及輕身幾危而復免凡茲僥倖悉荷曲成竊自省循
若爲克攝爰即始生之旦僭殫祗謝之忱方仰戴於至
仁敢妄希於多福但祈覆露俾脫灾危得於閒靜之中

究乃聖賢之蘊子方嚮學冀性識之日明婦未生孫期
冲和之早畀其他志願久矣監臨惟益堅平日之心以
敬聽高宮之命

戊子生日設醮青詞

蕭然華髮已開六袞之期保此顏齡正賴九霄之覆敢
攄丹悃祇叩鴻鈞伏念臣猥以妄庸居然僥倖早玷兩
科之選已愧非材晚陪六職之聯更虞過分故任職必
期盡力而立朝不敢阿容謬戾既多悔尤難免幸逃深

謫獲遂苟安顧頂踵之蒙恩豈涓埃之能報將臨誕日
豫歲醮儀專露衷忱懇祈造化星躔未順冀厄運之潛
銷年事浸衰願微軀之長健教子粗明於忠孝生孫早
協於休祥仰覬慈仁密垂廕佑樂天安土當恪守於舊
聞尊主庇民或少酬於晚節

生日設醮青詞

父之愛子惟疾疢之是憂天之愍民苟籲號而必救既
拜更生之賜敢忘造化之恩伏念臣好善雖勤省思有

愧賤齒已逾於四十弱息僅止於一人實為命以相依
且磨門之是賴頃緣延否幾困沈綿不勝舐犢之情尤
切傷弓之懼呼鑒餌藥慮人力之難施請命祈哀知天
慈之可訴燭寶薰於清夜瞻璇極於層霄百拜投誠一
心控懇果蒙矜宥旋遂痊安茲臨初度之期仰戴至仁
之造肅陳淨醑祇控謝忱臣男某伏望穹昊垂光聖真
敷佑堅其脆弱之質俾克永年開乃滯蒙之資俾知向
學不敢妄希於福祿惟斷粗保於戶門其在微臣置為

至足誓當父子相勉惟好事之力行天日實臨敢斯言之
自畔

仙遊安奉北斗青詞

緬瞻圓覆唯璇璣之獨尊爰肖睟容即琳宮而歲事於
以作千古山川之鎮豈特嚴一方香火之修消良日以
奉安按冲科而專繹願令合境悉為富壽之民敢曰私
門獨覲生成之造

求孫設醮青詞

暮景將臨日僊生孫之慶高穹可籲敢干育物之仁稽
首投誠鞠躬請命伏念臣謏庸無取忝幸獨多所當勉
務於操修其敢復懷於僥覲惟念續承之重每深慚望之
私幸化工垂溥博之恩俾子舍有孳萌之漸根茲既兆
正須雨露之功坯冶將成允賴鈞陶之妙爰卜春元之
令序仍涓天喜之佳辰肅實醮以致祈冀璇霄之嘿佑
蠲其災害收十月之全功貸以冲和備五行之正氣庶
傳家之有托實被德之無窮願寬僭瀆之誅俯賜生成

之造

己丑設醮青詞

天威孔邇居懷祇畏之誠歲序更端冀輯和平之福敢
攄丹悃仰瀆皇穹伏念臣以一介顓蒙之資荷兩間覆
載之德昔者叨榮而竊寵敢忘鈞播之至仁今焉負罪
以投閒亦佩玉成之深意每洗心而思咎期進德以修
身所慮隱微之間不無差忒或犯幽冥之譴弗自覺知
屬履新元載消良日敬露禳除之禱願垂貸宥之恩自

微臣犬馬之身逮闔門螻蟻之聚各蠲災沴咸迪吉祥
俾當杜門退處之時而有玩志討論之益庶幾於道或
竊睹於萬分誓畢此生常堅持於一念

祈雨青詞

大田將稔忽罹旱暵之災上帝至仁忍棄生靈之命爰
共殫於忱悃冀仰徹於穹旻睠茲浦城僻在閩嶠山谷
多而膏腴之壤狹陂渠少而灌溉之備疎里居鮮甚裕
之家蓋藏有幾鄰粟無可通之路轉販尤艱故於歲事

之成虧尤切民生之利病粵從季夏乂苦常暘雖襍禴
之具修顧感通之殊邈雲方凝而復散雨欲作而驟休
倘霽霈之澤少稽將饑饉之虞立至載念戚休之同體
殆如焚灼之切身爰即道宮敬陳法醮願下雷霆之詔
申勅山川之神三日為霖亟救倒垂之厄百穀皆熟遂
為大有之年

仙遊謝雨青詞

歲功在望俄示罰於常暘天道好生旋垂恩而霈澤憂

虞頓解祈戴何窮竊念此邦粵繇季夏時屬當於三伏
雨弗至者累旬既衆心所共隱憂豈微臣獨能安視思
饑由已本素志之所存憂國願豐敢閒居而遂替念既
徧求於群祀尤當控請於上穹爰即真宮敬殫愚悃荷
至神之降格俾甘霖之屢霑最爾寸衷安有動天之實
大哉元造實垂拯物之仁今蚤稼既幸復全而晚苗亦
方漫茂敢因祇謝併露忱祈白露將臨願時賜滂沱之
雨黃雲彌望庶迄成豐稔之秋

祈晴設醮青詞

陰霖過度方重隱憂洪覆至仁遙開霽景生成莫大祈
幸無窮維粵故區實閩壯邑然瘠土多而膏腴之壤狹
愿民少而爭鬪之俗蕃頻年屢登僅爾帖泰一穀不熟
遽已咨嗟况鄰邦紛擾之秋正羣情惶惑之際共期一
稔以弭多虞乃自首冬以來忽罹淫雨之害歲功倘失
將立至於凶荒氓俗易搖懼或從而騷動方蠲穀旦虔
籲穹昊俄陰翳之屏除睹陽明之呈豁敬陳醮禮祇控

謝忱仰干上帝之好生俯宥下民之多辟雨暘寒燠俾
無失序之愆臯疾戕兵潛泯未形之患獲保生靈之命
悉由造化之恩

生日設醮青詞

我生之辰安在幸適際於嘉時帝降之衷有常懼難全
於正性敬修法醮虔露微忱伏念臣蕞爾顙蒙居然僥
倖歲行在戌與震位以協和命宿於辰有陽明之臨照
凡半生之忝竊皆大造之埏鎔材乏寸長積玷朝廷之

寵咎盈百謫乃保山林之安顧在臣已極叨逾豈外此
敢萌希覬惟慚道蔭俯逮愚蹤無疾癘以殃厥躬無尖
害以撓其志優遊問學俾深究於精微持養身心獲漸
臻於純一期無悖聖賢之訓戒庶不孤天地之生成是
為罔極之恩敢控由衷之禱

庚寅保安醮青詞

微生多幸夙蒙化育之恩新序載臨冀錫康寧之福敢
殫忱悃僭瀆威神伏念臣本出單寒早居華顯雖頻年

退處魯罪戾之未銷然舉室粗安荷生成之特厚居每懷於思省敢妄意於僥踰屬此新年既以寅而易丑加之大運將自卯而遷辰顧災祥未易測知在愚拙惟深戒懼爰肅陳於淨醮用祇籲於皇穹願垂矜憐拯濟之仁俾免艱險屯危之厄倘一宗百口之衆俱保聚廬之安凡勺水粒米之甘無非造物之賜當勉修於寸善期仰答於三靈

立春日仙遊安奉玉皇青詞

璇霄有赫夙蒙徧覆之仁寶殿肇新爰舉慶成之禮併
陳忱悃仰冒穹威維時神景之祠擬於嘉定之歲雖琳
宇之規模粗備亶號名區而玉虛之館御未嚴殊為闕
典叶衆誠而共建即元朔以奉安一境山川既從茲而
增重萬年薌火將燕及於無窮言念去冬以來適有鄰
封之警雖道里頗相悠邈而里閭未免震驚日須蕩定
之期共享和平之福惟好生者上帝之大德而喜安者
下民之至情願軫鴻慈密回妙造俾遠近氛埃之頓息

而生靈壽命之獲全雞犬之聲相聞浸底阜康之俗蟲魚之性各遂悉陶化育之恩

生日設醮青詞

年齡向晚適臨誕育之辰氣運迭移正值舊新之會實深祇懼輒露忱祈伏念臣猥以妄庸居然僥倖學問未優而竊科名之寵材能何取而汙侍從之班積有愆尤畧無稱塞雖投閒之滋久顧揣分之誠宜方屏跡以杜門庶飭躬而補過茲控籲天之請敢萌徼福之私獨虞

星曜之照臨未臻協吉重慮陰陽之衝激或至召災爰
祇叩於洪鈞冀嘿回於厄運家和身健併骨肉以俱安
盜息兵銷與鄉閭而共慶此惟至願仰乞曲成大造無
疆夫豈微生之能報餘年有幾尚期衆善之力行

辛卯生日設醮青詞

道與貌天與形夙賴甄陶之化乾稱父坤稱母敢忘覆
載之恩爰屬誕辰敬攄忱悃伏念臣藐然凡陋奮自孤
寒德薄而竊虛名材微而叨顯秩靖言僥倖每切兢慙

茲虔叩於高靈敢妄希於多福世途方梗願早開寧謐
之期年事浸衰冀粗獲康彊之吉教子知承家之學生
孫無乏祀之憂仰紫極以投誠蘄鴻慈而從欲至仁涵
貸曲全螻蟻之生晚節保持益勉駑駘之力

粵山入宅設醮青詞

坤德主靜懼干犯以罹殃天道好生敢虔共而請命仰
斷大造俯賜曲成伏念臣曩以舊廬徙於茲土雖蔽風
雨而避寒暑粗適厥居然奉齋祭以接神明則無其所

不思量力之義輒為庀役之謀半載於茲衆工交舉闢
地雖寡在方隅寧免有妨閱月既多於時日豈能俱利
慮觸幽冥之禁莫逃譴罰之威載念孤蹤奮由寒峻陋
哉環堵之室固已有餘巍然數仞之堂豈其當作悖孔
氏求安之訓違孟軻弗為之言嘿自省循寔深愧忤敬
消良日祇按真科躋地有陳冀至仁之垂宥聚廬並處
俾永世之無虞嗣續之生日蕃忠孝之傳弗墜屋廬幸
有敢同韓愈之誇車馬可容誓勉于公之德

壬辰上元設醮青詞

三元紀節莫如春孟之先五福錫民願被天官之施輒
伸丹悃僭瀆蒼穹惟粵山柘水之間自己丑庚寅之後
始焉鄰讐殃恐及於池魚繼以歲凶危殆同於幕燕仰
蒙妙造俯庇含生既大田嘉穀之告登復近境妖氛之
頓熄豈伊人力悉出天恩爰即琳宮肅陳寶醮祇謝曲
成之德更祈徧覆之仁二炁均調潛銷旱溢之變五兵
寢息各安耕鑿之常蠶麤得以倍收虎豹為之遠屏家

給人足俾獲親於升平天施地生其敢忘於化育

上元設斗醮禳虎青詞

生靈何辜重罹猛獸之害昊穹是愬願垂洪覆之仁竊
念此邦比更多故歲事饑荒之後雖一稔而未蘇鄰氛
震擾之餘幸羣情之少定豈謂負嵎之暴至有啗人之
凶老幼驚呼嗟籲天而莫救骨骸零落痛委地之可哀
田野為之膽寒樵蘇幾於路絕懼傷殘而未已豈禳禱
之可措仰祈造化之恩亟拯黎元之命神功嘿運遂除

南山白額之妖害氣自銷不待東海赤刀之祝

中元仙遊建醮青詞

孟商令序適當宥罪之期神景殊庭寔維集福之地敢
憑淨醮祇達衆誠伏念臣某猥以塵凡居然晚陋霞裾
星弁既獲玷於道流琳館瓊臺復嗣居於法席惟謹焚
修之職少酌覆載之仁屬中元三五夜之臨環諸里數
百人之衆並齋心而潔慮冀赦過以除愆或以士農工
商斲安生業或為祖先親屬追拔冥途厥志甚塵所求

尤切既難拒卻謹為奉行伏望穹昊垂憐神明敷佑俾
生者獲五福康寧之祉而歿者無九幽沉滯之悲凡有
所祈各如其願旱乾極矣尤為切近之災雨澤沛然幸
錫豐登之慶庶安樂土之歡實戴高真之賜

謝雨青詞

早為災而屢禱既沐恩憐澤甫洽而復愆益深危懼敢
因祇謝併控忱祈臣等昨屬亢陽數干洪造旋被沾濡
之施少寬炎赫之憂早稼雖傷幸僅存之猶有晚苗甚

茂尚小稔之可期方共戴於殊恩欲恪修於報禮夫何
不雨忽又兼旬老稚皇皇日俟穎金之秀晨昏切切停
聞炊玉之香儻所望之復垂將其生之莫保流離俶擾
何者無之危急存亡孰甚於此臣等比叩蒼旻之聽豫
陳黃籙之盟敢於福祿以有求但欲鄉閭之無禍願矜
忱悃亟弭亂萌惟一雨之霈然則羣情之安矣若風雹
霜蟲之害冀悉賜於蠲除諒天地父母之仁必不厭其
煩瀆

生日設醮青詞

歲月之運易流又臨初度天地之恩難報恐負宿心輒
殫懇懇之誠仰干赫赫之監伏念臣奮由孤冷本極凡
庸敢圖大造之矜憐俾以一生之僥幸材非可用廼竊
寵之特優罪有當誅復蒙恩而苟免祠館甫還於故秩
州符遽析於舊封嘿自省循若為答塞念昔立朝治郡
之日每以尊主庇民為心豈以未塗而忘素守所願始
終而策勵祇虞衰病之浸陵莫克有為真成自負肆當

誕日虔告高真俾臣得衛養之宜令臣無憂患之擾筋骸強健可任國事以驅馳耳目聰明能察人情之幽隱少施薄效有補明時奉身而歸訖全靖退之節傳家有訓勉循清白之規

玉皇三清殿祈雨青詞

伏以旱而望雨不勝迫切之情窮則呼天輒叩穹窿之聽比以累旬之愆亢深虞多稼之焦枯幾遍禱於靈祠迄未臻於嘉應今赫炎已極在高田既鮮獲全倘霑溉

少稽雖平壤亦將可慮維此億萬人之命繫在三五日之間非仰懇於高穹懼莫回於大造即仙山而齋宿瞻帝極以懇祈仰冀至仁俯矜忱悃或災臨分野願密賜於轉移或罪在生靈勾曲垂於赦宥起龍神而奔走屏妖魃以退歲三日以往為霖大慰雲霓之望八政之首曰食廣全溝壑之生

北斗真武殿祈雨青詞

伏以凡民有生莫切豐年之望不雨斯極豫懷艱食之

憂惟上聖之至仁為羣元之司命恭伸禱請願賜矜憐
霈甘露於久曠之餘全嘉穀於將枯之際庶獲成於中
熟實仰戴於殊恩

謝雨青詞

早當七月苗欲槁以可憂山起寸雲雨崇朝而遂徧獲
解倒垂之急端由兼覆之恩睠是窮鄉夙稱瘠土三隅
斗絕粟可往而不可來百室罄垂歲宜豐而不宜歉屬
夏秋之方接蔚禾稼之相望蓋數日以須成猶調飢而

待哺實穎實粟共忻樂歲之可期如悵如焚豈料亢陽
之為虐望雲霓而隕涕睇原野以傷心用赴愬於高穹
冀興憐於下土果蒙孚答屢賜霑濡式寬旦暮之憂仰
戴乾坤之施念晚稻收成之尚早而秋陽赫烈之可虞
願深軫於至仁俾時蒙於嘉澤百里而半九十庶全末
路之危甫田之取十千終遂有年之望

仙遊山設醮青詞

叨恩起廢俾游牧於清源歷吉問塗敢虔祈於紫極伏

念臣昔當疆仕嘗玷專城粗殫撫字之誠莫著藩宣之績邦人亮其踈拙或至去思朝家滌其愆尤復加選任既懇辭而弗獲將竭蹶以有行修程寢迫於嚴寒暮齒更虞於多病顧惟瑣質愧乏他長獨其一意於斯民時乃平生之素志兩邑創殘之後正急拊摩羣生憔悴之餘尤須拯拯願夙宵而盡瘁猶疾痛之在躬庶息呻吟少蘇疲瘵冀大造賜保扶之力使微軀免灾眚之憂長幼均安川途無阻早達明山之境以慰瀕海之眚潔白

公勤誓益勵昔年之操安平富樂期漸還故國之風

泉州入宅設醮青詞

起廢復來獲撫吏民之舊揆才非稱惟漸造化之恩睠
此溫陵昔稱名鎮內環七邑生齒寔蕃外控重冥風濤
難測禁旅尤嚴於節制蠻商貴有以招懷凡御衆牧人
之方與悅近來遠之道倘非強敏詎免垂踈伏念某曩
玷專城時方強仕夙宵勉竭曾微政事之長始末保全
悉賴神明之力敢謂十六年之久荐叨二千石之除憂

患屢更已迫衰殘之境瘡痍未復可嗟窮悴之眚志雖
切於撫摩力恐難於負荷仰祈覆幬曲借生成俾其身
無疾疢之憂家有平康之喜庶專一意思濟羣生廸以
清明炤幾微而罔失錫之強健嬰繁劇以有為施為允
愜於物情惠利亟蘇於民瘼公勤廉白誓愈勵於初心
富樂安平期早還於舊觀

上元設醮青詞

暮三百六旬之日適換新春知四十九年之非浸驚暮

齒敢殫悃幅僭瀆威神伏念臣本以凡姿加之陋學荷
生成之特厚慚忝竊之大優材匪適時繆享無功之祿
德非足已更叨過實之名積有愧於幽明致自貽於譴
責既投閒而置散每思微以省愆屬新律之載更懼餘
灾之未弭爰寓誠於寶醮用請命於皇穹仰冀慈仁俯
垂矜赦蠲除殃咎誕降吉祥俾身健而家安庶心寧而
志一杜門屏跡獲靜處於丘園教子讀書共講明於道
義茲為志願敢復他求

春祈紫極宮青詞

春令平分豐功肇始當舉祈年之禮况逢閔雨之時即
太紫之真宮修上清之法醮匪僅循於故事實深徯於
殊恩盖今羣眚懣懣之餘正切百穀豐登之望非亟被
滂沱之澤何由施播殖之工仰觀天慈俯矜民命載沾
載足不愆東作之期實好實堅迄遂西成之慶

清源洞三清殿設醮青詞

方春告早實關終歲之憂濱海為州素乏上腴之壤矧

自冬而至二月凡不雨者幾數旬比雖嘉澤之屢敷猶
苦高田之未洽奈何開霽又復浹辰瘠土易乾加盛陽
之輝赫穉苗欲長乏積水之涵濡正當種蒔之時乃有
焦熬之意猶方孩而失乳將何道以能生臣是以疾首
痛心祈恩請命冀至仁之務惻回妙造於須臾三日以
往為霖俾溥臻於霑足八政之首曰食庶可必於豐登
州治設醮青詞

農功最急莫如春夏之交雨澤不時倍切生靈之望歷

丹衷而控請冀洪覆之興憐惟此邦夙號於樂郊至近
歲遽成於凋俗公私耗竭上下煎熬祖薄弗登旬月之
儲何有商舟罕至斗升之直尚騰自載忝於州符每勤
求於民瘼嗟撫摩之無術獨抱百憂欲愁嘆之少紓惟
斷一稔豈虞種殖之際廼有乾亢之灾高壤未耕既成
稿白穉苗方秀浸覺萎黃無陂渠可以灌輸有風日為
之炎爍比親行於原野實痛切於肺肝若為銷變以名
和但有祈哀而請命皇矣上帝仁恩普及於昆蟲今此

下民生意將危於絲髮當窮途而亟救豈大造之所難
願軫隆慈嘿回哀眷霈然甘露膏此大田穡事以時庶
豐穰之可必牧臣有罪奚譴罰之敢辭

設廳謝雨青詞

民以食為天莫切豐登之望守視民如子居惟疾苦之
憂泣嘉澤之弗時而首種之不入一歲收成之計將墮
眇茫萬人饑饉之餘近在朝夕臣是以履郊原而震惕
瞻雲漢以悲傷欲斷紆患於生靈惟有祈哀於穹昊祓

嚴公宇敷列醮筵葉笈琅函正宣揚於清夜玉漿瓊液
俄飛洒於層霄甫及兼旬之間數蒙澍雨之應大矣曰
生之德揅此垂絕之人既拜殊恩敢稽祇謝顧惟瀕海
之地土脉易乾重以盛夏之時炎威有赫願俾梅霖之
相續庶幾穡寶之用成和氣致祥不爽陰陽之序富歲
多賴寢興仁遜之風

離明殿設醮青詞

煌煌執法之星威靈有赫奕奕明離之殿欽奉素嚴屬

當炎煥之時敬飾祈禳之典念茲南服實曰溫陵地處
盛陽之方常多燥烈海有颶風之害每懼煽揚欲期比
屋之莫居惟仰高真之敷佑願垂道蔭溥及黎元既庶
既安永熄祝融之警時暘時雨併銷旱魃之虞

雲榭設醮祈晴青詞

農方望歲幸蚤稼之告登政有干和致陰霖之為沴洗
心思咎頓首祈恩伏念臣再忝郡符屢周月琯曾微惠
利俾民瘼之昭蘓獨有愆尤煩天威之譴告始則示常

賜之罰今焉召淫雨之災皆薄德之自貽豈至仁之所
欲旱幾成而復挽既荷曲全穀已熟而可收忍令遽失
願軫生靈之命俯垂化育之恩宣陽曜以破昏霾揚清
風而散蒸鬱錫以兼旬之霽保其終歲之功若其獄訟
之滋繁與夫刑罰之乖戾幽枉之情豈無未達歎愁之
氣或有未伸初非有衆之辜時乃微臣之臯恐懼修省
誓殫朝夕之誠覆載生成永賴乾坤之造

雲榭設醮謝晴青詞

曰雨曰暘海拜璇穹之賜有祈有報用嚴寶醮之陳頌
值陰霖懼傷嘉穀爰即侵雲之榭敬修請霽之儀寶炷
初升虔叩九霄之聽烏輪有赫遽騰六合之光開麗景
以彌旬收全功於一稔厥惟大幸敢昧隆恩更祈覆幬
之仁俯矜凋瘵之俗五穀熟民人育屢錫豐年百室盈
婦子寧長為樂土

秋賽紫極宮設醮青詞

再命為州每深憂於黎庶一誠望歲知幾瀆於神明早

方熾而嘉澤隨潦未收而晴光煜敢云薄德能感格於
帝心獨賴至仁寔哀矜於民命錫之一稔活此羣生公
私之計少寬覆育之恩莫大敬陳菲報併露忱祈無風
雨蟲螟之苗以全晚節有黍稷稻粱之慶迄用康年

生朝設醮青詞

覆載無私豈待求而降福天壽不貳惟自勉於修身屬
此始生敢云妄禱念薦分於符竹已浸迫於桑榆獄訟
昔簡而今繁非精力莫能剗決財計昔充而今匱非智

慮不可幹旋一日弗勤則弊易滋一事弗親則情易壅
懼微躬之難强冀大造之嘿扶俾常强健而清明庶克
從容而疇酢矧為仁由已而成功則天臣之此來豈有
他念凋瘵者望其蘇息愁歎者欲其歡愉雖殫朝夕之
勞期還舊觀匪賴神明之佑曷遂初心三農已幸於告
登二氣更斲於不忒海無駭浪里絕驚塵用足而志以
成刑清而人自化粗收薄效不徒垂老之重臨少慰羣
情即獲奉身而蚤退

離明殿設醮青詞

視民由已每慮患於未然修祀以時冀蒙休之有永惟
泉為郡在閩最南炎燠之氣在四序以常多震蕩之風
或連朝而弗息倘非賴上聖高真之佑何以免祝融回
祿之災爰卜季商敬修淨醮仰蘄赫赫之鑒俯庇林林
之氓比屋相望各遂和平之樂聚廬託處永銷謗出之
虞

黃錄醮青詞

歲獲豐穰祇戴璇穹之施禮嚴報謝敬修寶錄之科輒
至日以陳儀為邦人而輯福伏念臣職叨作牧志切念
民昨屬莫春久罹亢旱嘉種尚難於入土大田敢覲於
有秋載瞻雲霓若隕淵谷蠢蠢黎元之衆將何以生皇
皇上帝之仁必非所忍願需及時之澤迄成大有之年
果狗誠求始猶響答天地之裕萬物豈以為恩臣子之
薦寸忱亦云寓敬當黃宮之紀節即琳宇以告虔三日
九朝用道家最盛之典一封七聚冀天覆無窮之休陰

陽之聚靡愆旱溢之苗弗作天吳效職護舟楫以安行
回祿戢威保室廬而聚處矧鄰疆之相屬有狡衆之未
馴懼或至於蔓延勾亟臻於綏靖四境之塵不動復見
太平百蠻之貨畢徠重為富國臣雖叨易鎮敢有遐心
閩粵之壤本同均在十連之後造化之功無外願回一
道之春

普度青詞

遺民何辜橫罹鄰寇之殃舊郡重臨思拯冥途之苦用

伸追拔各冀超昇歲在丑寅之間盜作汀樵之境承平
歲久既武備之弗修醜類日蕃致妖氛之浸廣惟時德
化以及永春密連竊發之區旋被侵陵之禍兵戈匪練
誰知禦賊之方官吏相先自作全軀之計委群氓於鋒
鏑之下舉二邑為煨燼之餘游魂蕩於太空枯骨暴於
曠野淒風急雨諒多號噉之悲厚地重泉更抱幽沉之
歎念此淪亡之衆皆嘗撫字之人豈憫惻之亡情幸歸
依之有路屬修崇於黃籙敢籲告於紫皇凡厥同時暨

於諸郡有隸名於黑簿悉度命於朱陵北鄙鬼羣無復
久淹之繫西方淨土舉為極樂之游

甲午仙遊設醮青詞

奉藩弗績誤蒙九陛之知賜召使還猥與六官之選懼
莫酬於主眷庸祇叩於天慈伏念臣昨在初元嘗參近
侍屬值權姦之顓政惡聞讜直之盡言一斥七年始叨
牽叙載更兩鎮方效撫摩適公朝盡起於名流而孤跡
亦塵於華貫控辭靡獲圖報惟艱既不敢矯激以近名

亦不敢低徊而循利惟厚集精誠庶幾於感格而密陳
忠益冀見之施行上有裨於國家下有澤於民物臣之
願也天寶臨之仰句至仁默垂洪覆獲清衷之洞照俾
素蘊之盡伸得時則行肯負平生之自許奉身而退終
期晚節之蚤休

告斗祈雨表

伏為臣等所居建寧府浦城縣久闕雨澤虔伸醮告者
旱而望雨不勝怵迫之情窮則呼天冀徹穹窿之聽臣

某等誠惶誠恐頓首頓首乃睠浦城之境越由季夏以來甘霖久愆亢陽遂極協公私而共禱雖潤澤之屢沾泉乾而土弗濡未幾涸竭日炎而風亦燥有甚灼焚既高原下濕之皆枯將早稼晚苗之俱瘁望雲霓而感願瞻田野以傷心痛惟貧窶之氓甫遭饑饉之厄幸去冬之一稔猶瀕死而復蘇正須保養之功庶有安全之望倘重罹於凶歉必立至於顛隳靖言何辜遽至斯極矧民情自古以難保且鄉俗在今而易搖苟生理之或窮

恐禍幾之端作蠱蠢黎元之命殆幾絲髮之危皇皇后
帝之仁忍視塗炭之酷期嘿回於造化用哀籲於聖真
恭惟大聖北斗七元尊帝君斟酌一元綱紀七政念此
土菑傷之未久而斯人瘡痍之尚新申勅羣靈大敷渥
澤使欲槁之禾復活而垂成之穀獲登寔與函生均蒙
再造臣某等切循平昔積有愆尤顧省已之多慚甘以
身而受罰若蠢愚之罔識斲赦宥而弗誅普推滌蕩之
恩俾逭流行之數賜以樂歲悉為全人臣等祇荷曲成

誓當加勉神明森列敢萌自昧之心貧富相資深戒不
仁之習臣等無任瞻天仰聖激切屏營之至

祈雨醮詞

伏以萬民之天所仰莫如穡事之艱六月之雨不時深
懼田功之失控誠以禱從欲是求睠茲百里之區寔在
七閩之首山崇川駛粟可去而不可來民悍俗頑歲宜
豐而不宜歉昨緣霜隕有害秋成一朝而攘奪並興殆
幾挺變累載之蓋藏悉罄僅足捄饑幸禾麥之繼登與

里閭而胥慶然穀直之騰未減而民力之困自如非大
有之屢書豈小康之可冀迺繇季夏驟苦常暘多稼垂
成猶日望嬰童之長甘霖弗續是頓虧乳哺之功儻拯
抹之少稽將危亡之立至不勝震懼有甚灼焚爰率籲
於上穹冀興憐於下土勅羣龍而並起掃妖魃於方張
大雨時行願弗愆於月令烝民乃粒實共戴於天恩

仙遊告斗表文

伏以自夏及秋久被亢陽之虐維北有斗實司元氣之

權敢干再瀆之誅冒控一純之請臣等誠惶誠恐頓首
頓首竊以運行之數歲無常豐譴告之威天有定命所
當恭聽其可用陳曾未越於浹旬輒渎干於霄極蓋誠
有甚切而勢有至危念自叨將指以來嘗數任揀荒之
責常平可以振廩鉅室可以勸分或請命公朝有分頒
之錢粟或告糴鄰境有畢湊之舟車故雖逢歲之甚艱
尚克拯民於垂死乃如敝邑直謂窮塗四事一無將奚
相恤頻年屢稔始幸苟安當去載之告饑尚宿藏之可

仰茹草齧衣已弗忍聞拊鎖奴糧幾莫能逞豈容今日
更值凶年此微臣極朝夕以隱憂而壹志幸神明之垂
憫今早稻之存無幾而晚苗之損亦多願一再信宿之
間亟蒙大需庶十萬生靈之命猶獲少延恭望大聖北
斗七元尊帝君嘿運璣衡潛移氣數乘立秋處暑之際
敕興雲致雨之神敷降甘霖俾成中熟臣等以憂國願
豐之素志加與民同患之至情故寧九殞觸雷霆之嚴
典或萬分回穹昊之聽救災解厄之惠苟衆共以獲全

奪祿減筭之刑雖獨當而無憾臣等無任瞻天仰聖激切屏營之至

祈雨醮詞

亢旱為災由下民之有罪洪恩敷宥仰上帝之至仁竊念鄉邦久愆時澤田疇枯涸蓋幾千畝之相望父老驚嗟謂數十年之未睹公私交禱朝夕靡皇至洵貢於綠章以冒干於紫極雲蒸雨降幸數獲於感通虹斷風醺輒復為之霽止外里間聞於沾足近郊仍苦於焦熬泉

乾而井汲甚艱川竭而機春俱廢粟直騰踴人情憂危
今早稼多傷已非上熟而晚苗未槁猶望曲全用僭瀆
以再三冀興衰於衆庶赦其必死予以更生賜之三日
之霖徧及一同之境臣等夙緣愚懵積負愆尤漉血書
詞庶徹神明之聽洗心思咎敢忘覆載之恩仰冀穹慈
俯從卑悃

八月後雨晚禾
獲全次年不歉

紹定三年庚寅正月天慶觀祈禱弭盜告神疏

文

伏為汀邵之寇近犯長平等處為大軍迫逐
皆已出境又聞南劍管下官兵獲捷生擒賊
首謹詣三清寶殿虔伸懇禱者

歲當登稔方忻庶俗之安吏失拊循忽告鄰邦之警始
臨汀而及邵武延將樂以迫沙陽甫更半歲之間遍擾
數州之境生靈何罪多荼毒於干戈老幼相攜或顛仆
於溝壑或由間道遽越近封幸王旅之鼎來致寇兵之
潛遁然而狡謀叵測虐燄未衰倘非聖造之宥扶冒底

成功之克捷敬趨淨宇哀籲高靈願垂天地之恩嘿借
神祇之助俾羽林熊渠之衆得奮機謀雖風聲鶴唳之
聞亦皆震聳盡熄鯨鯢之擾復安鴻雁之居耕稼及時
不失厚生之望里閭按堵潜消幸變之心

告斗醮青詞

性均物則本由帝之降衷吏失威懷致陷身而為賊始
以捕鹽之峻繼之賞盜之非汀寇先搖邵郡從而煽動
劍民既擾建民亦以震驚甫逾半載之間遍蹂數州之

境莽為丘墟者殆千餘里戕於鋒刃者知幾萬人流血
幾於成川僵屍至於盈野雖曰下民之孽有以致茲仰
惟上帝之心夫豈忍此吉涓良辰哀籲至真願軫慈憐
俯垂庇佑或生靈有罪特推蕩宥之恩或分野當災嘿
賜轉移之造上俾師徒之克捷下令醜類之服馴潛銷
好亂之風亟歸嚮化之俗豈惟南浦訖免纖塵之驚坐
使全閩俱還樂土之舊

黃錄建壇青詞

綠林煽禍嗟鄰境之罹殃黃錄薦誠冀高穹之垂憫屬
舉告盟之禮敢殫哀籲之辭惟時汀邵之民本非好亂
况值聖明之世皆欲安生祇緣牧御之乖宜致使披猖
而為患兩邦相接半為煨燼之餘萬姓何辜殞於鋒鏑
之下虐燄既延於劍水妖氛幾及於建陽泉壤幽沉痛
矣銜冤之鬼道塗顛踣傷哉失業之人深虞厄運之未
銷惟賴皇穹之可愬願嘿回於造化以普拯於生靈遠
而閩部之八州近則浦城之四境兵戈頓息寇魃弗侵

田里相安耕稼自若凡彼失身而從賊亦皆悔過而為
民本業爭趨有渤海雞豚之樂舊汙悉變無崑岡玉石
之焚

黃錄祈晴青詞

民命獲全端賴神天之造醮儀將舉豫惟陰雨之憂盖
玄元大教之相傳維黃錄真科之最重方肆筵設席期
昭格於神明儻霑服失容惟有虧於禮敬矧招魂而施
食乃除地而為壇欲普洽於幽冥尤深斷於澄霽仰冀

高明之監俯矜懇切之忱勅賜谷以騰暉命雲師而卷
侵晴光炳煥相望七八日之間曠典園成式慰千萬人
之願

正醮青詞

事機方急共伸哀籲之誠造化密移亟霈更生之澤既
漸臻於寧晏其敢昧於曲成恭修黃籙之科僭瀆蒼昊
之聽臣等昨緣鄰寇橫逞兵鋒近騷武陽劍水之間遠
躡臨汝盱江之境深慮豺狼之罔測或伺鄉邦不量螻

螳之至微輒干穹昊深仁憫惻妙道幹旋麻沙方燬而
王旅適來譙城雖陷而賊徒遁返諸將奮貔貅之勇捷奏
踵聞羣盜即鯨鯢之誅克威頓屈昔慮滔天燎原之莫
制今猶摧枯拉朽之匪艱亶繇天意之嘿回故使人謀
之克濟凡父子弟兄之相保與比閭族黨之俱安自頂
踵皆出生全豈毫髮所能報塞屬當令節敬踐舊盟以
謝殊恩以祈終惠今江淮千里有未熄之妖氛而汀贛
兩邦有僅存之餘孽願垂眷佑亟遂救寧俾國勢逾磐

石之疆而民生獲奠枕之樂歲功告儉更虞溝壑之流
離兵餉甚殷日望干戈之寢息仰冀上帝好生之德俯
拯下民阽危之菑風雨均調載錫屢豐之慶乾坤清晏
復見升平之期

太乙青詞

至仁無外共瞻東極之慈尊妙力所加能拔北鄴之幽
苦輒殫忱悃偕瀆獻聰言念比年實為多難荆淮川蜀
之境既警備之未寧江湖福建之間忽姦偷之迭起嗟

克渠之不道歟醜類以成羣虐獸薰天妖氛翳日莽為
丘墟者凡數十縣戕於鋒刃者知幾萬人視生靈如草
菅以殺戮為嬉戲白骨枯骸之狼藉魂魄將何所依孤
兒寡婦之嗷號鬼神亦為之泣痛沈寃之無告憂滯魄
之難升敢因黃錄之殊科為愬青宮之上聖願軫大慈
大悲之念亟推普濟普度之恩望慶雲飛蓋之光悉超
幽暗被甘露神漿之滴盡獲清涼更蘄憐兆庶之生為
潜消百六之厄災虞盡弭亟臻平治之期存歿均安悉

拜涵濡之澤

十王表

民生可憫或罹凶橫之菑聖力無邊能拔沈淪之罪輒

殫忱悃僭瀆獻聰言念比年

云云至鬼神亦為之泣並同太乙青詞

願推

慈念普及冥塗凡濫死之亡辜俾超生而得所西方佛國並為極樂之遊北都鬼神盡釋久幽之苦

仙遊山謝斗青詞

蠢蠢萬民之命實制於天煌煌七政之樞獨尊者斗昨

以隣邦之倂擾致茲鄉井之震搖接彼封疆深懼池魚
之及紛然道路殆猶穴螳之移念事勢之至危恐禍機
之適作惟有籲號於穹昊庶幾全活於生靈爰即仙山
肅陳醮席陰威慘澹方嗟積雨之霖淫氛曠豁開忽睹
列星之明概仰止魁杓之象燦然霄極之中一心跂望
於垂仁百拜凌兢而請命旋獲安平之兆知蒙覆幬之
恩甫涉期年果戡大難日涓首甲月近上弦祓壇壝以
致虔為里閭而祇謝邊兵未寢尚勤宵旰之憂民食正

艱復慮溝隍之厄冀亟平於多壘且大獲於有年朝野
無虞浸還近古之俗山林雖老終酬致主之心

天慶觀禳火青詞

赫赫南方之曜夙仰威明林林下土之居均依覆育睠
此一同之聚殆逾千室之繁爰自邇年實為多故鄰氛
甚惡既更流徙之餘歲事弗登重罹饑饉之厄比間形
於兆朕更竊懼於災虞方嗟擠壓之氓未能自活設有
燎原之變將復奈何茲誠存亡危急之憂惟賴造化生

全之力敢控忱於上聖冀垂憫於下民潛祛回祿之妖
仍弭畢方之祟聚廬託處無諛諛出出之驚擊壤均歡
有簡簡穰穰之慶

天慶觀祈禱青詞

患深擠壑屬當饑饉之餘誠切籲天願賜豐穰之慶嗟
惟去歲驟失有秋始由積潦之過多重以嚴霜之早隕
陰沴侵而陽弗競既以奸和殺氣盛而生不蕃莫能遂
物茲皆人事之所感夫豈天心之欲然越繇春夏以來

艱食彌甚於今田野之衆殍死相望倉箱之積既空微
蕨之根亦罄欲拯斯人之瀕殆惟斲多稼之倍登爰滙
懇於上穹冀興哀於下土當其危急存亡之際賜以覆
露生全之恩二氣適均無苦雨疾風之害百嘉獲遂隨
高原下隰之宜皆既好而既堅且實穎而實粟豈惟俾
赤子之得乳是將起白骨而成人天地至仁庶一誠之
能動里閭相勉惟衆善之力行

是歲
大稔

仙遊設醮青詞

八月十二日常山寇破江山
迫近鄉邑九月十一日設醮

伏以足食安居實民生之至願弭災銷患豈人力之可
能僭干造化之仁庶保黔黎之命睠言敝境爰自比年
始則虞鄰警之侵旋復被歲凶之厄迄遂安恬之幸悉
由覆幬之恩今大田多稼之告登正茲刈獲而近郡羣
克之方擾未即蕩平冀穡事之獲全而兵氛之早熄即
仙山而致禱瞻帝極以投誠旬穹昊之垂慈俾鄉閭之
蒙福無風雨霜蟲之害無寇戎兵火之災百室充盈共

樂如茨之慶四封寧晏不聞橫草之驚

代男正追薦母青詞

母子恩深劬勞莫報死生路隔哀慕難窮敢竭至情僭
干洪造伏念臣母楊氏頃緣嬰疾遽致沒身享年僅及
於三旬抱恨遂成於千古靈魂炯炯固自不亡長路茫
茫果將焉往惟清夢或窺其彷彿而私心恐墮於幽沉
痛念平生實鍾善性救人之急則雖傾橐以弗辭遇姑
之疾則不解衣而親侍精勤以繙內典齊潔以奉高真

蓋出至誠匪由外飾惟天地以好生育物為德惟聖賢
有赦過宥罪之言是用敬撫危迫之衷冀動高明之鑒
俾臣母楊氏早憑善果獲遂超昇顧雖駒犢之至愚永
佩乾坤之大賜

代祈嗣青詞

伏以休戚相關莫如伉儷之義安平是望敢干覆育之
仁伏念臣妻室某幸出忠勲之門粗閑閨壺之則然氣
形稟受本孱弱以弗強而運數推移復災虞之或值既

連歲妊娠之屢失且平時疾苦之居多匪虔叩於聖真
懼難回於譴咎屬季春之誕日即神景之名山肅按冲
科用伸忱禱仰覬穹窿之大造俯矜么麼之微生銷三
災九厄於未萌永獲康寧之祉賦二氣五行之至正早
鍾誕毓之祥俾慈父適意於抱孫而愚臣顙精於嚮學
豈獨闔門之被賜實惟永世之蒙休誓堅忠孝之誠毋
負生成之德

己丑外舅生日設醮青詞

將耆而耄倏臨八袞之期既壽且康冀錫九疇之福逖
瞻層漢虔露寸忱伏念臣叢爾微生居然多幸決科甚
晚名早脫於銓曹入仕數竒官亦叨於元士年浸高而
免支離之苦祿雖薄而無寒餒之虞糟糠之老獲偕椿
桂之榮相踵凡茲僥倖皆非始望所期揆厥本原悉出
大生之賜屬當初度祇按真科顧上天加厚於微臣不
勝至足在今日有求於造物敢復無厭惟蘄北極之至
仁俯照西崦之未景蠲其災疾衍厥壽祺子舍掀騰各

遂榮親之願孫枝孕毓益綿繼世之祥誓畢餘齡勉修正道

庚寅外舅設醮青詞

老將至而耄違常切寅威之念天雖高而聽下願垂覆
幬之仁僭以悃忱形於奏請伏念臣迂愚何取忝竊實
多每當誕育之期載念穹窿之造養生甚拙已逾古來
稀有之年從宦雖艱粗享人間無事之樂輒陳菲薦以
謝高靈屬自仲春以來適有鄰邦之警亟攜家而遠避

致曠禮之弗修幸王旅之沓來俾寇徒之少戢修塗于
後迄逃風露之浸故里來歸不改山川之觀拊摩卉木
瞻顧棟楹昔惟捐弃之是虞今乃存全之如舊皆自天
而錫佑顧何地以疇恩敬消薦七之辰恪興純一之念
萃露裾之清侶按雲笈之冲科敢曰禱祈更希無妄之
福但期赦宥獲弭未形之災盜早息於潢池民相安於
田里俾闔門百口之衆永保聚廬之居凡勺水粒米之
甘無非造物之賜

外舅生日設醮青詞

父生母鞠難酬罔極之恩日往月來永感賤生之旦非
假演冲科之妙教何以寓追遠之寸心謹竭丹誠肅陳
清醮伏念臣晚叨末第幸脫選坑宰邑黃巖罪愆叢積
分司列院斥罷不容摧顏三黜之餘閒散十暮之久雖
自讒言之萑菲實由已德之輕浮幸皇天開改過之門
而列聖垂遷善之訓臣敢不省愆責已滌慮洗心赦其
言行之悔尤原以取舍之差失桑榆晚景期體道之康

強桃李春風保餘生之清逸

辛卯外舅設醮青詞

伏以無德而壽倏開九表之期不勞而官將冒三階之
寵顧臣庸昧奮跡單微早學古人妄意寸功之及物晚
叨朝籍止蘄一命之榮親雖中歲之險艱而未塗之僥
倖迨衣冠之已挂乃綸綍之屢頒論議名官行厠漢廷
之千石子男錫號猥聯周爵之諸侯雖朱轡畫鹿之莫
疇而紫綬垂魚之亦罷凡茲命數俱非始望之可期况

是年齡遠過古來之稀有自揆蠢愚之質曷勝覆育之恩爰即誕辰謹修法醮但知敬謝何敢多求視聽俱全願保微軀之健子孫浸盛更全暮齒之榮

庚寅代蔡宰設斗醮祈晴青詞

蚤稻大成廼逢霑雨積氛小解未快全晴控百里之危
悵瀆七元之聰聽伏念臣濫膺繁劇實愧眇縣或政刑
之頗偏致陰陽之乖戾倘茲歲不登於一稔則斯民益
重於百憂欲祈天意之回更藉斗真之力敷誠玉笈歸

命璇璣伏願颯馭博臨帝車下格洗出虞淵之皦日盡
掃陰霾陶為柘水之豐年少蘇民望

代楊和甫作賽醮詞

伏以有室有家未免妻孥之累載生載育實依造化之
仁既獲遂於安全詎敢忘於大賜敬陳淨醮祇控微誠
伏念臣猥以塵凡夙叨蔭佑頃緣荆布之賤乳蓐有期
重以羔豚之微疾疾為苦輒披丹悃虔叩蒼旻顧私情
仰瀆於高真合嬰譴罰而洪覆靡遺於小物曲借生成

免身既幸於無虞勿樂入臻於有喜屬春物萌芽之始
正化工發育之時爰擇剛辰肅迎真馭以謝曲成之造
以祈滋至之休惟雙親耆父之齡各登七袞而百世繼
承之託僅有一人仰賴慈仁俯垂矜憫並介壽康之祉
更膺蕃衍之祥臣敢不思滌愆尤恪修志行終身自勉
期為善人君子之歸方寸不欺庶答皇天后土之賜

代周道珍黃錄普說

竊惟道家之法以清淨無為為本修齋設醮特教中之

一事耳然自漢以來傳習至今不可廢者以其用意在於揀度生靈蠲除災厄而開人悔過自新之路故也世之闢道教者或謂上帝至尊惟國家可以郊祀而以臣庶行之則幾於僭或謂禍福有命不可以求而致不可以倖而免今之齋醮其名曰禳災集福是福可求而禍可免也則幾於妄此皆儒者正大之論安得而非之然非國家不可以祀天者禮之正也若臣庶之微精誠迫切有動於中則往往籲天地叩神明以自救故曰人窮

則呼天又曰惡人齋戒沐浴則可以祀上帝道家醮法
特以伸臣庶哀籲之誠而非郊祀之比也然既有禱有
禳則必須章奏而後達必藉科儀而後行故自漢至今
其法益詳其禮益備然惟臣子為君父官府為民庶士
夫為鄉黨以公請而不以私求者則其應如響若僥倖
以求福矯妄以避災出於私求而不以公請者則亦神
明之所不聽道家之所不許也由是觀之道家齋醮之
法安得謂之僭且妄哉夫弭裁兵遠罪疾寧風旱祈豐

年具載於周禮之書有國遵行未之或廢況於盜賊甲
兵之釁驟發於鄰壤如燎原之火有蔓延之勢當是時
也非籲天地叩神明何以弭災於未萌銷患於冥冥乎
是以里居官某官等以紹定二年十月二十七日相率
有祈於道官且許修設黃錄大齋醮一會為一方生靈
請命於昊穹盖里居為鄉黨邑宰為民庶其請以公而
不以私故自時厥後王師大集捷奏日聞克渠束手以
就擒餘黨望風而遁散倘非天地好生之仁神明助順

之意安得數月之間其效遽至此哉今黃錄大齋官道
衆莫不咸集道珍不材誤蒙推擇使主醮事法當演法
不敢支離曼衍以煩衆聽獨以儒道二教其說畧同僭
陳其一二蓋詩有之上帝臨汝無貳爾心又曰皇矣上
帝臨下有赫又曰神之格思不可度思矧可射思禮記
亦云洋洋乎如在其上如在其左右凡此皆言上帝神
明近與人接不可斯須之不敬不可一念之不誠也道
家則又推言居處宮殿之名冠冕車服侍衛威儀之列

又謂衆真百靈皆有貌象其為宮觀則擬而效之至於醮事之修俯伏拜跪儼然如風馬雲車之來下雖其說似與儒者異然其為教不過欲啟人肅敬之心使見者凜然知天地神祇之臨其上則邪意妄想自然消弭善端正念自然感發亦豈為小補哉今者寶醮將成伏願齋官道衆凡預此會者各體前聖垂戒之言與道家設教之指清淨其身心端一其志慮毋謂高遠為可欺毋謂杳冥為可忽夫古人之於祭祀必三日齋七日戒者

蓋非誠敬之極不可以交於神明所謂戒者肅然警懼之謂也所謂齋者湛然純一之謂也故易曰齋戒以神明其德而宗元吳先生著元綱論亦曰非齋戒則真不應今日但以不飲酒不茹葷為齋戒而不知齋戒之義非止於此方其散齋七日則肅然警懼猶履薄臨深之可畏及致齋三日則湛然純一心如止水寂然不動無思無為如是而後為精誠之極神之聽之介爾景福庶乎其可必矣不然雖修飾於禮文之末而不致謹於心

術之微欲冀神祇之格福應之臻則非道珍之所敢知也若夫星弁霞裾號稱方士尤當清淨以對越內而存念無一毫之雜外而行禮無跬步之差表裏渾然終始如一庶幾無負吾祖師之教而免於幽冥之罰此道珍與衆所宜共勉者也不然則三官有罰九府有刑凜如斧鉞甘心背違自取誅譴道珍竊懼焉事大體嚴輒敢縷瀆伏惟孚察

西山文集卷四十九

欽定四庫全書

集部

西山文集卷

五十二

詳校官廡吉士_臣張溥

總校官降調繆

_臣

倉聖脉

校對官編修

_臣

沈清藻

謄錄監生

_臣

張誠智

欽定四庫全書

西山文集卷五十

宋 真德秀 撰

疏語

清源洞謝雨疏

冬者四時之畢雖不厭於常暘麥為五穀之先又正資於時雨肆越故常之典特伸祈懇之誠仰荷至仁過臻嘉應雲陰倏布既收潤澤之功日耀旋開復免霖淫之

害曲成至此忻幸何窮顧當粟烈之期尚乏嚴凝之氣
雪飛到地固南土之所稀露結為霜在化工而甚易敢
因祇謝併控愚衷儻陰陽無偏勝之愆則民物有安生
之樂瀆煩是懼譴罰敢辭

清源洞祈雨疏

戊寅十一月一日

歲以稔聞方惟多稼之喜雨弗時至又深無麥之憂蓋
當播殖之期正賴沾濡之澤今高田欲種而無水以耕
下田雖種而無水以溉戚休所係愁歎相聞況夫風高

氣燥則居者用虞泉竭井枯則汲者告病皆民生之甚
患豈守土之敢安是用奔走乞靈虔共請命寸雲觸石
願倏變於陰威三日為霖庶均沾於德施

安奉真人誥命疏

當州伏為冲應善利昭靈博濟真人顯膺寵命加進徽
名謹率官僚虔伸奉安者仙聖以濟物為心初豈靳於
褒寵朝廷惟有功是報顧何間於幽明既大庇於含生
宜進膺於顯號恭惟真人清虛體道湛寂凝神昔游戲

人間以卻疾蠲痼而自任今翱翔天上猶禦裁捍患之
不忘睠此邦人夙依道蔭或農或賈咸獲堵安曰雨曰
暘殆猶響應爰徹九重之聽增崇八字之封綸告鼎來
輿情咸慶涓辰安奉愈增耀於名山有衆阜康更永祈
於靈貺

清源洞祈雨疏

己卯閏月初一日

麥正刈而欲晴既荷曲成之造稻方秧而渴雨敢輸虔
禱之誠蓋農事所係非輕而春旱最為可畏儻少稽於

潤澤將立見於焦枯不勝危迫之情願賜生成之力需
然甘靈活此良苗俾播種之及時庶豐穰之可望鞠躬
以俟從欲是期

清源洞謝雨疏

東嶽同閏
月初五日

兩辰之間曰閏適農事之正殷三日以往為霖荷化工
之遙答臣職叨作牧志極念民屬甘靈之少愆懼良苗
之易槁戴星而出甫伸踏地之恭零雨其濛亟沐隨車
之澤連朝昏而相續極高下以均霑但深抃蹈之私難

報穹窿之施輒憑淨醮冀達微忱所欲天必從之已拜
曲成之造自今歲具有矣願漸終惠之仁

東嶽清源洞祈晴疏

三農之望有秋亶云至切六月而得甘雨顧以為憂蓋南
邦田事之最先而閏歲天時之尤蚤瞻平疇之綺錯蔚
多稼之雲連父老相誇謂積年之未睹妻孥共喜幸
一飽之可期儻未息於霑霑將有妨於刈穫垂成而毀
茲豈造物者之心轉戚而忻特煩彈指頃之力願賜兼

旬之明霽庶償終歲之勤勞瀝懇輸誠鞠躬俟命

寺觀設醮謝晴疏

六月十三日

雨以潤物過乎度則為留天維子民哀其窮而必掾

云疏

甘霖本以潤物過則為留諸佛切於念民窮斯必掾以陰雲之沴凜乎害稼之憂奔走有祈顧瞻如響劃重雲而見白日六合清新弭駭浪而為安流百川順聽仰至仁之易感戴鴻施以何窮屬當收穫之期不厭晴明之久崇墉斯積願克保於歲功擊壤均權其敢忘於帝

力疏作
佛力

寺觀謝晴疏

嘉穀告登既卜有年之慶連陰不已遽為積潦之留不
勝朝夕之憂亟扣乾坤之造賴神功之密運俾霽景之
遙開波漲平疇昔幾壞於垂秋之頃雲屯高廩今獲全
於將失之餘愁嘆頓舒歡忻相告用是肅陳淨供

觀云

淨醮祇薦微忱曰雨曰暘願益臻於時若有稷有黍更
期遂於秋成

疏云

不勝悚迫之情亟扣慈悲之造賴威

神之密運

祈雨疏

治郡無堪致亢旱熒焚之虐籲天有請荷如來矜恤之
仁起羣龍於潛伏之時推妖魃於熾張之日拜恩甚溥
思報何從惟水陸之名齋罄幽明而蒙澤衆生苦惱猶
渴望泉諸佛慈悲如雨濯熱願均此施普及有情脫煩
冤於沈淪幽滯之中遍大地作快樂清涼之境併斷終
惠迄畀豐年無愆陽無伏陰永協冲和之氣有遺秉有

滯穗曲全鰥寡之生

祈晴疏

百穀仰雨久蒙大造之曲成九月築塲茲幸舊功之將
畢日凱茨梁之積廼惟靈潦之憂言念三農備嘗耕耨
之苦政須一稔少寬饑餒之虞使垂就而復隳在隆慈
其安忍輒披誠悃仰冒明威冀陰翳之遙開俾陽光之
丕煥百里而半九十獲全永路之艱甫田之取十千迄
遂有年之喜

上元祈禳醮疏

歲方更始仰盛德之主生職在長人懼匹夫之失所輒
伸丹悃仰瀆蒼旻某猥以迂愚繆司牧養幸千里粗安
於無事而三農共慶於有秋俾吏責之少寬荷神休之
罔極屬上元之錫福為下土以祈恩爰被公堂恭陳法
醮冀垂皇鑒加憫蒼生幹元化以調雨暘敷至和而除
疾癘祝融息警各安棟宇之居風伯戢威咸適帆檣之
便勤拳有禱孚格是期

東嶽祈雨疏

伏以溫陵在昔僉曰樂郊歷載于茲浸非舊觀蓋生齒蕃而可耕之土狹故良農寡而逐末之俗成政使有秋尚虞乏食況下溼之地甫以澇聞而高仰之田今復旱告儻遂失嘉穀收成之望將立見細民捐瘠之憂蚤夜以思寢食幾廢仰惟靈嶽俯庇羣方願推造化之仁曲軫生靈之命興油雲於膚寸浹膏澤於邇遐嘉與邦人共霑德施

開元寺祈雨疏

伏以嘉穀方華甘霖未浹屬茲蒞事之始尤深艱食之虞當及是時蚤為之計是用瀝丹誠而有請冀皇覺之垂慈憫此邦新罹洪水之蓄而今者復苦驕陽之虐大霈及時之澤以成登稼之功一飽有期民相安於鼓腹百廢具舉吏亦得以究心矢言弗諛願佛昭鑒

諸廟疏

某叨綰郡符蒞事伊始周視原野黍稷方華而甘霖愆

期人情狼顧近雖一雨而高卬之地猶有可憂惟神廟食此邦同民休戚願需三日之霖以遂有秋則某始得以究心摩撫維吏與民均沐大賜再拜以請神其聽之

張大帝廟疏

某頃在江東凡弭留拯患之事一惟明神是賴神亦鑑其微誠其應如響竭來此邦適以旱告奔走羣祀僅獲一雨而高卬之地猶有可憂方將設神之位以致懇祈乃有以東湖之祠告者踴躍欣幸而今而後得赴懇之

所矣敬持瓣香俯伏以請惟誠察其歸仰之素閱其憂
勞之切丕降膏澤俾克有年豈惟不肖之責藉以少寬
民亦永永事神無怠

安奉清水疏

伏以維盛夏實司長養久闕甘霖與此邦有大因緣莫
如清水肆迎法馭來駐梵宮昔混沌迹世間不憚曝身而
救旱今遊神天上豈難翻手以為雲願垂慈憫之仁亟
降滂沱之澤輿情共囑響應是期

安奉諸佛疏

伏以服田力穡誰無望歲之懷閔雨為民尤重承流之責既靡神而不舉捨我佛以疇依方伸迎奉之恭遽沐感通之速興慈雲於瞬息之頃莫測我神需惠澤於枯槁之餘悲霑法施然而滲漉之恩雖廣旱乾之患已深更冀寬慈亟終大賜俾獲有秋之願敢忘善救之仁

送諸佛歸山疏

伏乞慈悲救物我佛願心早暎為災斯民何罪控忱辭

而有請勞法馭以來臨一雨霑濡四野膏沃幸少慰雲
霓之望其敢稽龍象之留飛錫浮盂雖去來之無迹驅
雷叱電尚浹洽之有期

東嶽清源洞寺觀祈晴疏

嘉澤以時實謂豐年之兆良苗方穗又虞積潦之傷忝
任撫摩交深喜懼矧月逾既望正潮汐之轟虺儻雨不
亟晴將田疇之冒沒輒殫誠款祇扣嶽洞聖靈寺觀慈
仁昭揭陽烏遄臻開霽指麾河伯毋使沸騰迄成登稔

之功亶荷龐鴻之施

東嶽䟽語

親闈奄弃悵懿範之莫追靈輓來歸即私庭而暫駐處
大邑浩穰之地當亢陽乾燥之時每終夕以深憂恐融
風之易扇敬攄危懇仰瀆聖聰果蒙覆燾之仁遂免鬱
攸之警迨既即安於吉壤亟圖展謝於殊庭屬以抱疴
幾成廢禮惟至明之無外察愚悃之不恭寬其逋慢之
誅賜以存全之慶

告斗卜地䟽語

伏以罔極恩深莫効劬勞之報送終事重方求宅兆之
安雖博訪於名山猶未諧於吉卜念造化機緘之至妙
豈凡庸心目之可窺是用瞻斗極以輸誠瀝肺肝而控
請願垂矜憫顯發秘藏山水濛洄兼脩冲和之氣子孫
昌熾永為忠孝之家

南嶽正廟䟽

癸卯春初
至潭州

天下之獄凡五封守各殊南方以衡為宗威神最盛矧

國家素嚴於尊事豈臣子可怠於欽承顧惟草芥之微
繆玷藩垣之重俶開幕府方祇畏於簡書逖望靈宮未
克伸於謁拜謹憑掾吏虔奉瓣香仍省眊於山林且譏
呵於樵牧輒抒忱懇冒徹聖聰載念三湘獨雄諸鎮然
而土田多瘠野無盡力之農旱澇相望里乏厚儲之室
杼柚空於科率耰鉏習於鬪爭臣猥以凡材驟茲臨長
孜孜訪問冀利病之獲聞汲汲拊摩若恫瘝之在已顧
人力易窮於有限惟神功獨妙於難名仰覬深仁俯矜

涸俗雨暘叶序俾充膾庾之藏田里奠居永息鼓桴之
警庶民生之各遂亦吏責之少寬稽首投誠鞠躬望賜

天慶觀等處祈晴疏

春而多雨本非厭數之時職在長民當軫深長之慮蓋
氣數乘除之可畏而陰陽偏勝則為蓄況是良農日期
登麥至於紅女尤急條桑儻積滯之相仍懼全功之或
失雖有心於憫俗愧無術以召和爰遣屬僚控陳忱悃
冀慈仁之垂憫俾昏翳之遄開霽景熙暘並改崇朝之

觀甘滋美澤留為後日之儲庶二氣之均調斯百嘉之
蕃庶控誠以請從欲是求

仰山靈濟王生辰疏

伏以聖靈挺出本太極之同初世俗相傳乃誕辰之有
紀雖變化莫窺其妙用然依歸可驗於衆心蓋以事親
之誠寓諸獻壽之禮幽明雖異愛敬則同某繆綰州符
密依神庇循比年之曩則演大法於真乘仰冀弘慈俯
垂鑒相五風十雨永銷乾溢之虞三湘九嶷共洽和平

之化

天慶觀等處祈雨疏

十七日祈
十八日雨

伏以農家占歲常取決於分龍郡守憂民敢先期而請
雨念此湖湘之凋俗異乎江淞之樂郊縱遇豐年猶多
愁嘆雖名巨室類乏蓋藏苟惟一穀之弗登立見羣生
之告瘁撫摩是任休戚寔同輒豫控於微衷冀曲垂於
大造寸雲觸石頓收炎赫之威三日為霖丕降沾濡之
澤迄成一稔用弭百憂

天慶觀等處謝雨疏

伏以節名龍會實惟望雨之誠職忝虎符亟致籲天之
請荷洪慈之易感俾甘靈之隨霑雖未臻三日之霖亦
少蘇五月之暑其為訢戴實倍故常然壬戌之朝欲雨
而遽晴甲子之晝既晴而復雨繇秕政之多有且愚誠
之未孚竊自省循敢忘祇懼願言大造加惠小民潛銷
乾溢之虞迄畀豐穰之慶

二十一日謝二十四日大雨
至次日巳午而後止人謂二

十五日正
分龍日也

天慶觀等處祈晴疏

伏以萬民之天所資者食六月之雨嘗著于經方竊幸於
應期可遽憂其過度蓋長沙之旱濕自昔所傳倘積潦
之霖淫寔民之病矧平疇之綺錯有多稼之雲連數日
以須正切良農之望垂成而毀必非造物之心

佛改
大覺輒

控忱辭冒干穹聽冀慈仁之深軫俾陰翳之遄開霽景
熙暘亟改崇朝之觀甘滋美澤留為後日之儲奔走有
祈敬共以俟

天慶觀等處謝晴疏

伏以分龍甫屆既霽雨而雨隨鳴鶴弗休復謁晴而晴
應繇浩浩至仁之易感豈區區涼德之敢期仰戴殊恩
亟伸祇謝惟憂民之誠切故望賜之日長願言七八月
之間時霑嘉澤庶俾千萬人之聚共樂豐年

天慶觀等處祈雨疏

伏以億萬人之生惟食是仰七八月之旱從古所憂粵
繇邇日以來頗愆時雨之潤雖早稻已臻於收穫而晚

苗正急於沾濡得之則生若嬰兒之需乳哺閔焉以望
甚暘暑之待壺漿敢瀝衷忱仰干聖造寸雲觸石冀倏
變於陰威三日為霖俾均霑於膏澤庶遂豐穰之願敢
忘覆燠之恩

天慶觀等處祈雨疏

伏以允離異治最忌相干雨暘以時尤虞偏勝自履素
商之序浸愆嘉澤之期比雖霖沐之屢沾猶苦滂沱之
未應高原下隰政深涸竭之憂炎日燥風又極蘊隆之

虐誰謂九秋之半廼如三伏之中某職在牧民心勤望
歲愧亡善政可召陰陽之和嘿訟多愆殆忘寢食之節
輒殫忱懇渚扣隆慈霈然三日之霖滌茲千里之旱苟
有衆安生之可望雖以身塞咎而敢辭滯悃投誠鞠躬
聽命某無任

迎東明觀音及諸龍湫水齋疏

繆政干和盍正守臣之罰亢暘為沴廼貽農畝之憂念
拯救之無階亟奉迎而有禱惟慈悲廣大莫如諸佛而

變化迅速莫如羣龍既來會於一堂諒垂憐於百姓興
雲致雨特顧盼之可為飛電奔霆惟指麾之所向忽闕
神功而弗露坐觀妖魃之肆行今則埴未鵲鳴田將龜
圻倘數日之間尚遲霑洽則一年之計遂墮渺茫願哀
斯民亟霈之澤灑楊枝之露瞬息十方散天瓢之泉涓
滴萬里偃躬以俟從欲是期

奉送神位聖水疏

慈悲廣大莫如諸佛之尊變化飛騰莫若神龍之妙比

以亢暘之沴凜乎害稼之憂奉瑞像以來臨叩靈湫而
遍請果蒙矜憫俯賜感通油雲密布於九霄膏雨遶周
於四境其為訢荷未易名言三日以往為霖願亟臻於
霑足八政之一曰食庶獲遂於豐穰仰冀隆私敢忘昭
報

祈晴疏

九月

民之可憫無若良農物之難成莫如嘉穀今歲將大熟
而雨則過多人皆相顧以隱憂天獨何心而弗掇繇始

耕以至今日不知幾朝夕之功轉積潦而為晴空特出
一吐嗟之力寺改特出為願賜在化工而甚易幸慈憫之亟施
寺改庶收成之不失則愁嘆之亟紓瀝悃以祈得請乃已某無任激切懇
禱之至

謝南嶽行宮等處疏

荆楚之郊繆塵委寄黔巫之地實在統臨繇郡政之靡
臧致戎行之弗靖初喧譟於官府繼剽掠於民居自郵
報之蜚馳姑權宜而撫定載念國家之制法豈容卒伍

之亂常期亟正於典刑遂密加於規畫顧人謀之難恃

惟神理之可憑輒控忱祈

南嶽云果蒙宏造佑聖云果形吉兆

首正鯨鯢

之戮盡空狐鼠之妖軍律頓張物情胥快匪惟四境獲
全有衆之生抑俾庶邦潛弭未形之患粗塞曠療之責
悉繇覆露之恩爰卜良辰敬伸謝悃尚靳蔭佑永底奠
安臣無任激切感荷之至謹疏

天慶觀等處謝雪疏

伏以冬者四時之畢實兆來年雪為五穀之精日需嘉

應方涓辰而致禱俄飛霰之效祥茫乎宇宙之間恍若
瓊瑤之飾仰神功之至妙佩恩施之何窮輒露寸丹上
瀆穹窿之聽更斷三白益昭豐稔之符臣無任激切懇
禱之至

天慶觀等處祈晴疏

好雨知時豈其所厭沉陰過度則有可憂蓋惟艱莫甚
於農功而至重無逾於蠶事穉苗之出既欲煖而惡寒
柔桑之求又喜乾而畏濕倘二者或乖其所望則萬民

何恃以為生況穀價之未平而物情之方鬱復久罹於

霖澇宜愈重於歎愁職在撫摩心如焦灼竭丹誠

佛云
哀誠

而控懇冀洪造

佛云
慈造

之垂憐麗日冲融煥晴光於甲子

惠風和暢回淑景於莫春庶開樂歲之祥實慰亟生之

願

謝晴祈豐疏

春無幾何止田家之作苦雨非所厭懼寒氣之過期亟
奔走以控誠荷慈憐之從欲開麗景於崇朝之頃轉凝

陰為三月之和新秧之出如針且將頃長大繭之成若
甕抑又可期矧當甲子之晴實兆豐年之慶用伸祇謝
併露忱祈言念細民方茲艱食蓋以豪強之年利居然
睥睨以俟時惟氣令弗愆歲有必登之望斯蓋藏畢出
人無貴糴之憂仰觀穹昊真佛曰俯矜凋俗曰暘曰雨俾
永臻時若之休若富若貧庶咸遂安居之願臣無任

祈雨疏

民之為生莫先於足食雨以潤物尤貴於及時况甫更

芒種之期且將屆分龍之日必梅霖夢澤相望彌月之
間斯穡實懷新可必豐年之望此農畝推占之常驗而
守臣傾僊之至情爰詣殊庭僭干大造自今以迄夏至
願數霑優渥之仁指日以俟秋成庶少蘇凋瘵之俗

謝雨疏

時方仰雨寔豐稔之攸占志切念民豈禱求之敢後荷
至仁之易感俾嘉應之亟隨始沾濡於芒種之辰旋霽
靈於會龍之日破鉅室閉藏之吝慰良農傾僊之勤仰

戴天恩俯從人欲用嚴祇謝併控忱祈蓋嘉穀之方苗
正資蔭潤猶嬰兒之得乳廼克生全矧是窮眚久茲艱
食共斷一稔以解倒垂雨施雲行時賜豐腴之澤家給
人足永銷愁嘆之聲

祈雨疏

民既病而後憂孰若軫憂於將至旱為裁而有禱寧如
致禱於未然睠言龍會之期方極鸛鳴之喜甫逾旬而
弗繼已望雨之至深蓋方烈日之如焚重以炎風之交

煽故雖平壤僅存膚寸之滋矧在高原宜如卦兆之圻
念羣生之久瘁賴一稔以少瘳倘登場之望少愆則擠
壑之虞立見用披丹烟虔扣鴻慈三日為霖願崇朝之
亟應烝民乃粒庶一飽之可期

南嶽正殿祈雨疏

亢旱將成竊懷憂於農畝至仁可籲敢歸命於帝庭瞻
是窮阯久茲艱食斗升之價既方踊而未平倉庾之儲
又所餘之寧幾惟斷一稔以解百憂顧嘉穀之方苗乃

驕陽之甚熾間雖沾灑寧敵歎炎倘歲事之或傷則民生其安仰遙瞻靈嶽披瀝丹衷伏願興祝融之寸雲敷為六合之蔭灑雷池之勺水大作三日之霖使生靈之命獲全則覆幬之恩何極控誠以告得請是期

南嶽正殿疏

歲事是祈方苦赫赫炎官之虐聖靈可怙孰如巍巍神嶽之尊比檄尉曹恭趨帝闕慮悃誠之未徹復簿正之遣行蓋驕陽愈熾於中天而亢旱有加於前日其為望

賜殆甚揀焚惟帝至仁察臣忱請興寸雲以敷六合之
蔭散勺水而為三日之霖用昭響答之恩庶解倒垂之
急

祈雨疏

佛力無邊能救大地衆生之苦龍神至妙實司上天利
澤之權廼睠此邦適罹亢旱念孰拯悞焚之厄爰並伸
迎奉之恭蓋佛之為佛與天心相為貫通而龍之為龍
於佛法最為欽重願同垂於矜惻亟共濟於焦枯大興

慈雲丕降法雨示刹那頃神通之廣大全億萬人性命
於貼危疾首痛心虔竚慈悲之施剗肝瀝血敢陳迫切
之詞

離明殿奉安疏

煌煌執法之星最尊列曜奕奕明離之殿近在殊庭顧
久虧繕治之功懼莫稱欽崇之意既庀工而告畢爰取
日以奉安載念此邦適罹亢旱良苗方茂既憂甘霖之
不時列棟相望復慮融風之易煽敢抒丹悃虔敬鴻慈

願推覆燾之仁潛弭赫炎之氣豐隆專蔭大為三日之霖回祿收威永熄一方之警

太乙殿醮疏

元陽為沴懼莫保於豐穰羣望遍祠迄未霑於潤澤瞻言淨宇夙奉高真既此邦蒙福之孔多且往歲致祈之亟效爰肅陳於清醮用披瀝於丹衷蓋難安者田里之情而易動者湖湘之俗連年獲稔猶或歎咨一旦告饑將奚拯救仰冀高明之監俯推覆育之仁需三日之霖

盡甦嘉穀全萬民之命永載鴻恩

送諸佛諸神諸龍䟽

七月初四日

集神靈而求潤澤庶有感之必通舍清淨而就囂塵或
又虞於不肅涓良辰而敬餞即邃宇以虔祈嗟乾亢之
已深非滂沱而莫濟興寸雲於衡麓倏遍九天挹勺水
於洞庭遂決千里在衆聖斡旋之甚易尤羣龍噓吸之
所能願體上帝好生之仁以救下民垂死之厄不勝忱
扣仰冀矜從某無任

東明疏文

早魃如快焚嗟損傷之已甚觀音妙智力欲拯濟以奚
難顧久駐於公庭乃未均於惠澤竊意即囂塵之地不
如還清淨之居挹玉甃之寒泉涓滴能蘇於千里灑楊
枝之甘露須臾遂遍於九天願興一念之慈憐速救萬
民之苦惱某無任

湘山疏文

直上天關曾見零陵之夢兆能蘇旱歲具存王氏之記

文顧靈蹟之甚彰實湘人之共敬茲伸迎奉虔致懇祈
何久駐於公庭乃未均於惠澤竊意即器塵之地不如
還清淨之居大雄大力大慈悲願軫羣黎之苦惱既優
既渥既霑足亟蘇千里之歎愁控誠以求得請乃已某
無任

南嶽諸處祈雨疏

旱魃為虐將貽卒歲之凶昊天曰明爰軫斯民之苦屢
錫霏微之潤少寬枯槁之憂仰戴恩憐不勝感涕顧乾

亢之期已久而涵濡之澤未深時節侵尋事勢迫切倘
甘霖即沛則蚤稼猶不盡傷若畏景彌驕則晚苗亦將
告瘁此歲功豐歉之決實民命存亡之分敢洊叩於鴻
慈願嘿回於妙造先立秋之氣至俾大雨之時行庶俾
億萬人之生有以自活若時二千石之罪則不敢辭臣
某無任

天慶觀等處祈雨三清殿疏

寶穡將成適苦旱乾之虐璇穹非遠屢殫哀籲之誠荷

大造之好生拯細民於垂死粵繇癸卯以洎甲辰倏興
觸石之雲旋沛傾盆之雨昔焉龜坼之壤今遂沾濡向
者狼顧之氓莫不訢喜粟直之騰遽損稻苗之瘁頓蘇
仰戴隆恩敢稽祇謝顧赫炎之尚熾而滲漉之未深矧
當立秋處暑之間正需時澤願下屏翳豐隆之敕亟運
神功俾膏液之滂流庶良疇之充足迄成一稔用濟羣
生臣無任

天慶觀諸處祈雨疏

歲其有矣日需收斂之期雨以潤之延曠沾濡之澤念
早稼既傷於夏旱賴晚苗可冀於秋成庶償南畝之勞
且補東隅之失忽兼旬而愆亢極中夜以憂思爰瀝忱
詞仰干大造願軫困窮之苦亟垂溥博之恩白水盈疇
式慰下民之望黃雲被野迄全上熟之功

謝晴疏文

大田多稼幸一稔之可期淫雨害苗乃連朝而屢作亟
輸危惴遽荷深慈回大造於杳冥之中劃重陰於呼吸

之頃坐免橫流之患益昭善利之仁假守何能唯虔依
於化育真誠有請願迄畀於豐穰

保安赦至告白聖祖殿疏文

聖主御圖甫越三十年之久宸衷念治每勤一二日之
幾積煩聽覽之勞致爽起居之節雖天人信順之助當
即獲於清安而臣子忠孝之心自不勝其迫切用嚴精
禱式迓殊休仰蘄善應之仁亟臻勿藥之喜皇極五福
永綿寶歷之期長沙一星益煥璇宮之照

南北井並翠峰疏文

伏以蕉峰萬仞之山上摩層漢靈湫一勺之水中有神
龍靜而淵潛所以存身動而天飛則能濟物合乾道變
化之妙猶聖人出處之時顧念此邦久罹亢旱爰協心
而控請願驤首以出游浮雲滂興大雨霧靈三秋萬頃
獲為中熟之年百姓羣黎共荷更生之造

西山文集卷五十

欽定四庫全書

西山文集卷五十一

宋 真德秀 撰

疏語

闕

西山文集卷五十一